

Powšitkowne WOZJEWJENJA

njedźelu, 22. julija 2012

Putnikowanje džěci ze starobiskopom Reineltom

Džěci Drježdžansko-Mišnjanskeho biskopstwa, mjez nimi něhdže 500 ze serbskich wosadow, změja swoje putnikowanje do Róžanta srjedu, 25. julija. Božu mšu w 10.30 hodź. změje starobiskop Joachim Reinelt na putniskej łuce. W připołdnišej přestawce poskića so džěcom wšelake workshopy. Z nyšporom w 14 hodź. so putnikowanje zakónči

Swjata spowědź w Róžeńće

Wšitcy, kotřiž chcedža porciunkulski wotpusk zdobyć, maja mjez druhim w Róžeńće składnosć, sobotu, 4. awgusta, wot 17 do 18 hodź. sakrament swjateje spowědže přijec. Spowědnicy su fararjo Beno Šolta, Michał Anders, Gabriš Nawka a Johannes Magiera.

Z busom do Krupki kemši

Na Božu mšu srjedu, 1. awgusta, w 10 hodź. w Krupce pojedže tež lětsa bus. Štóż chce sobu jěć, njech přizjewi so pola Šmitec wozydłownistwa w Radworju, telefonowe čisło (03 59 35) 28 60.

Swobodne džěłowe městno w Smječkecach

Dom swjateho Jana w Smječkecach pyta chorobnu sotru respektiwnje hladarja chorych abo kularku respektiwnje pedagoga z wotpowědnej kwalifikaciju za džěło pola duchownje zbrašenych a z nazhonjenjemi w nawjedowanju personala kaž tež w spěchowanju zbrašenych. Wodźaca pozicija ma so hač do 1. septembra wobsadzić. Požadanja přijima nawoda domu Tadej Šiman, telefonowe čisło (03 57 96) 88 61 31.

Putniska jězba do Fatimy a Santiago de Compostela

Wot pónđzele do pónđzele, 10. do 17. septembra, wotměje so putniska jězba do Fatimy a Santiago de Compostela (z lětađlom a busom). Někotre městna za tute putnikowanje su hišće swobodne, tak zo móža so zajimcy hišće hač do srjedy, 15. awgusta, přizjewić. Dalše informacije poda a přizjewjenja přijimuje Matthias Hadank z Hórkow, Sydlišćowy puć 2, telefonowe čisło (03 57 96) 9 40 37.

Eagle-eye-camp w Róžeńće

Što je wěrnosć? Hdy sym zbožowny? Sym woprawdže swobodny? Štóż ma tajkele a podobne prašenja, za toho móhl Eagle-eye-camp zhromadženstwa swjateho Jana zajimawy być. Tuta młoda zhromadnosć z Francoskeje zarjadowe wot wutory do pjatka, 7. do 10. awgusta, w Róžeńće stanowe lěhwo – a to na zakładze spirituality zbóžneho Jana Pawoła II. a jeho encykliki „Fides et Ratio“ (Wěra a rozum). Klóšter Marijina Hwězda je tomu dopomhał, zo móže so camp krótkodobnje we Łužicy přewjesć.

Štóż ma zajim a je znajmjeńša 18 lěť stary, móže so hač do soboty, 28. julija, pola sotry Sina-Marie ze zhromadženstwa swjateho Jana pod e-mailowej adresu eagle.eye.camp@gmail.com přizjewić abo sej najprjedy wjace informacijow wuprosyć. Wobdžělenje płaci ze zastaranjom 60 eurow. Štóż nochce stanować, ale so tola rady wobdžělić, móže doma přenocować a wšědnje do Róžanta přijěć.